



Primljeno: 06-02-2026			
Org. jed.	Kl. ozna.	Red. broj	Br. priloga
01	04	286/16	

Broj: 02-04-238/26-AP-3
Datum: 06.02.2026. godine

GRADSKO VIJEĆE ZAVIDOVIĆI
n/r PREDSJEDAVAJUĆA GRADSKOG VIJEĆA
Hadžić dr Amira, spec. radiolog

PREDMET: Prijedlog Odluke o subvencioniranju troškova komunalnih
usluga na području Grada Zavidovići, dostavlja se

U prilogu akta dostavljam Vam Prijedlog Odluke o subvencioniranju troškova komunalnih usluga na području Grada Zavidovići.

Prijedlog Odluke o subvencioniranju troškova komunalnih usluga na području Grada Zavidovići dostavljam Gradskom vijeću Zavidovići radi uvrštavanja u dnevni red sjednice Gradskog vijeća.

Na osnovu člana 61. stav (8) Poslovnika o radu Gradskog vijeća Zavidovići – prečišćeni tekst („Službeni glasnik Grada Zavidovići“, broj: 7/2022 i 1/2023), Gradonačelnica predlaže da se u dnevni red 15. sjednice Gradskog vijeća Zavidovići zakazane 11.02.2026. godine u 14:00 sati uvrsti tačka dnevnog reda pod nazivom:

- Prijedlog Odluke o subvencioniranju troškova komunalnih usluga na području Grada Zavidovići i da se razmatra kao 3. tačka dnevnog reda.

Prijedlog za ovu dopunu dnevnog reda podnosim zbog potrebe subvencioniranja troškova komunalnih usluga na području Grada Zavidovići za građane socijalno osjetljivih društvenih grupa.

S poštovanjem

Dostavljeno:

1. Naslovu,
2. U spis.

Akt pripremila:

(Fatima Merdanović)

Akt pregledao:

(Nermin Čahtarević)



GRADONAČELNICA

mr. iur. Erna Merdić Smailhodžić



Broj: 02-04-238/26-AP-2
Datum: 06.02.2026. godine

Na osnovu člana 7., 13., 33. i 34. stav (1) Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/99) i člana 10. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022), Gradsko vijeće Zavidovići na svojoj __. sjednici, održanoj dana __. __. 2026. godine donijelo je

ODLUKU

o subvencioniranju troškova komunalnih usluga na području Grada Zavidovići

Član 1. (Predmet)

Ovom Odlukom propisuju se subvencije komunalnih usluga, korisnici subvencija, ostvarivanje i prestanak prava na subvencije, način ostvarivanja subvencija i nadzor nad primjenom ove Odluke.

Član 2. (Subvencije)

(1) Komunalne usluge koje se subvencioniraju na područja Grada Zavidovići su vodosnabdijevanje, odvodnja otpadnih voda i zbrinjavanje komunalnog otpada iz domaćinstava za građane socijalno osjetljivih društvenih grupa iz člana 3. ove Odluke na čije ime je ispostavljen račun o plaćanju komunalnih usluga.

(2) Subvencija iz stava (1) ovog člana odobrava se sa ciljem omogućavanja ekonomske priuštivosti komunalnih usluga za sve građane Grada Zavidovići.

(3) Subvencija iz stava (1) ovog člana odobrava se po računima JKP „Radnik“ d.o.o. Zavidovići ispostavljenim po Cjenovniku komunalnih usluga i načinu plaćanja komunalnih usluga JKP „Radnik“ d.o.o. Zavidovići na području Grada Zavidovići.

Član 3. (Korisnici subvencije)

(1) Korisnici subvencije iz člana 1. ove Odluke su nosioci obaveze plaćanja komunalnih usluga za domaćinstvo pod uslovom da imaju prebivalište na području Grada Zavidovići i da su pripadnici neke od društvenih grupa:

- a) korisnici stalne novčane pomoći prema propisima iz oblasti socijalne zaštite;
- b) korisnici ratne vojne invalidnine od VII do X grupe bez drugih redovnih primanja po bilo kom osnovu osim prava na „ortopedski dodatak“;
- c) korisnici egzistencijalne naknade po propisima iz oblasti boračko-invalidske zaštite;

d) korisnici najniže ili manje penzije po propisima o penzijsko-invalidskom osiguranju ako nisu korisnici razmjerne penzije sa inostranstvom;

e) korisnici prava na pomoć subvencioniranja stanarine prema propisima iz oblasti socijalno-neprofitnog stanovanja.

Član 4.

(Iznos i isplata subvencije)

(1) Subvencija iz člana 2. ove Odluke iznosi 5,00 KM sa PDV-om mjesečno po jednom računu korisnika subvencije bez obzira na istovremenu pripadnost u dvije ili više društvenih grupa iz člana 3. stav (1) ove Odluke.

(2) Subvencija iz stava (1) ovog člana isplaćivat će se mjesečno iz Budžeta Grada Zavidovići na račun JKP „Radnik“ d.o.o. Zavidovići za korisnika subvencije kojima će se ukupan dug po računu umanjivati za 5,00 KM sa PDV-om.

Član 5.

(Postupak ostvarenja prava na subvenciju)

(1) Korisnici subvencija komunalnih usluga nisu obavezni podnosti pojedinačne zahtjeve za priznavanje prava na subvenciju, a postupak će se provoditi po službenoj dužnosti JKP „Radnik“ d.o.o. Zavidovići.

(2) Podaci i dokazi potrebni za priznavanje prava na subvenciju komunalnih usluga pribavljaju se po službenoj dužnosti i dostavljaju JKP „Radnik“ d.o.o. Zavidovići kako slijedi:

a) Grad Zavidovići prikuplja podatke za korisnike subvencija komunalnih usluga iz člana 3. stav (1) tačka b), c) i d) ove Odluke.

b) JU „Centar za socijalni rad“ Zavidovići prikuplja podatke za korisnike subvencija komunalnih usluga iz člana 3. stav (1) tačka a) i e) ove Odluke.

(3) Korisnici subvencije komunalnih usluga iz člana (3) ove Odluke pravo na subvenciju ostvaruju počev od 15.02.2026. godine.

(4) Podaci i dokazi pribavljeni na način propisan u stavu (3) ovog člana ažurirat će se na početku svake kalendarske godine.

(5) Ukoliko podaci potrebni za priznavanje prava na subvenciju, a koji nisu u posjedu Grada Zavidovići i njegovih organa uprave, ne budu dostavljeni od nadležnih kantonalnih / federalnih institucija do izdavanja računa komunalnih usluga po ovoj Odluci, subvencija korisnicima komunalnih usluga će se primijeniti na prvom narednom računu komunalnih usluga nakon dostavljanja podataka za period iz stava (3) ovog člana.

Član 6.

(Isplata subvencije za komunalne usluge)

(1) Račun korisnika subvencije će sadržavati puni iznos obaveze za korištene komunalne usluge u skladu sa Cjenovnikom komunalnih usluga i načinu plaćanja komunalnih usluga JKP „Radnik“ d.o.o. Zavidovići na području Grada Zavidovići i iznos subvencije za kojeg se umanjuje ukupan iznos mjesečnog računa.

(2) Po izdavanju računa svim korisnicima subvencije komunalnih usluga za prethodni mjesec JKP „Radnik“ d.o.o. Zavidovići će dostaviti račun Gradu Zavidovići za isplatu subvencije komunalnih usluga uz dostavljanje spiska korisnika subvencije.

(3) Korisnik subvencije komunalnih usluga je dužan obavijestiti JKP „Radnik“ d.o.o. Zavidovići o svakoj promjeni koja utiče na korištenje prava na subvenciju u roku do 30 dana od dana nastale promjene.

Član 7.
(Obezbjedenje i visina sredstava za isplatu subvencija)

(1) Grad Zavidovići će obezbijediti potrebna sredstva u Budžetu Grada Zavidovići za 2026. godinu na poziciji „Subvencije JKP „Radnik“ Zavidovići“, konto 6144231, u potrebnom iznosu uključujući i sredstva za subvenciju JKP „Radnik“ Zavidovići u svrhu investicijskog ulaganja i pomoći hitnog izmirenja zakonom utvrđenih obaveza osnivača u skladu sa finansijskim mogućnostima Grada Zavidovići.

(2) U svrhu realizacije odredbi stava (1) ovog člana gradonačelnik će donijeti poseban Program realizacije sredstava sa pozicije „Subvencije JKP „Radnik“ Zavidovići“, konto 6144231.

(3) Budžetom Grada Zavidovići za 2027. godinu i dalje sredstva će se obezbjeđivati planiranjem posebne pozicije za subvencioniranje iz člana 2. ove Odluke.

Član 8.
(Nadzor)

Nadzor nad primjenom ove Odluke vršit će Služba za upravu poljoprivrede, vodoprivrede i komunalnih poslova Grada Zavidovići.

Član 9.
Gramatička terminologija)

Gramatička terminologija korištenja muškog i ženskog roda za pojmove u ovoj Odluci uključuje oba roda.

Član 10.
(Stupanje na snagu)

Ova Odluka stupa na snagu prvog narednog dana od dana objavljivanja u „Službenom glasniku Grada Zavidovići“ i početak će se primjenjivati od 15.02.2026. godine.

PREDSJEDAVAJUĆA
GRADSKOG VIJEĆA

Amira dr Hadžić, spec. radiolog

OBRAZLOŽENJE

PRAVNI OSNOV ZA DONOŠENJE ODLUKE

U članu 7. Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/99) propisano je: „Jedinica lokalne samouprave samostalno raspolaže finansijskim sredstvima u skladu sa zakonom“.

U članu 13. Zakona o principima lokalne samouprave u Federaciji Bosne i Hercegovine propisano je: „Organ odlučivanja jedinice lokalne samouprave je općinsko vijeće u općini, a gradsko vijeće u gradu (u daljnjem tekstu: vijeće). Vijeće u okviru svojih nadležnosti:

- priprema i dvotrećinskom većinom glasova usvaja statut jedinice lokalne samouprave;
- usvaja budžet i izvještaj o izvršenju budžeta jedinice lokalne samouprave;
- donosi razvojne, prostorne i urbanističke planove i programe, te provedbene planove, uključujući zoniranje;
- donosi propise o porezima, taksama, naknadama i doprinosima jedinice lokalne samouprave u skladu sa zakonom;
- donosi odluke o upravljanju i raspolaganju imovinom jedinice lokalne samouprave;
- donosi odluke o zaduživanju;
- donosi programe uređenja građevinskog zemljišta;
- donosi plan korištenja javnih površina;
- donosi odluke o organizaciji mjesne samouprave i nazivima ulica, trgova i dijelova naseljenih mjesta;
- donosi odluke o udruživanju jedinica lokalne samouprave u savez i druge oblike organiziranja;
- donosi odluke o proglašenju praznika jedinice lokalne samouprave;
- donosi odluke o nagradama i priznanjima jedinica lokalne samouprave;
- bira i razrješava predsjedavajućeg i zamjenika predsjedavajućeg vijeća;
- donosi odluke o raspisivanju referenduma;
- razmatra godišnje izvještaje o provođenju politike jedinice lokalne samouprave i aktivnostima načelnika/ce;
- osniva preduzeća i ustanove za obavljanje poslova od interesa za jedinicu lokalne samouprave;
- donosi poslovnik o svom radu;
- obavlja i druge poslove utvrđene zakonom i statutom.

Članovi vijeća odgovaraju za ustavnost i zakonitost akata koje vijeće donosi u okviru svojih nadležnosti.

U članu 33. Zakona o principima lokalne samouprave u Federaciji Bosne i Hercegovine propisano je: „Jedinice lokalne samouprave imaju pravo na pokretnu i nepokretnu imovinu i na odgovarajuće izvore finansiranja kojima slobodno raspolažu u okviru svojih ovlasti, kao i na sredstva za obavljanje delegiranih ili prenesenih poslova iz okvira prava i dužnosti viših tijela vlasti.“

U članu 43. stav (1) Zakona o principima lokalne samouprave u Federaciji Bosne i Hercegovine propisano je: „Jedinice lokalne samouprave imaju pravo na odgovarajuće sopstvene finansijske izvore kojima lokalni organi mogu slobodno raspolagati u okviru svoje nadležnosti u skladu sa zakonom.“

U članu 10. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022) propisano je: „Gradsko vijeće u okviru svoje nadležnosti:

1. donosi Statut Grada dvotrećinskom većinom glasova;

2. donosi odluke i druge opće akte kojima uređuje pitanja iz samoupravnog djelokruga Grada;
3. donosi budžet Grada, godišnji izvještaj o izvršenju budžeta kao i odluku o privremenom finansiranju u skladu sa zakonom;
4. utvrđuje gradsku politiku u okviru nadležnosti i prati njeno ostvarivanje;
5. donosi razvojne, prostorne i urbanističke planove i programe, te provedbene planove, uključujući zoniranje;
6. donosi propise o porezima, taksama, naknadama i doprinosima Grada u skladu sa zakonom;
7. donosi odluke o upravljanju i raspolaganju imovinom Grada;
8. donosi odluke o zaduživanju Grada, o raspisivanju javnog zajma i davanju jamstva u skladu sa zakonom;
9. donosi programe uređenja gradskog građevinskog zemljišta;
10. donosi plan korištenja javnih površina;
11. donosi odluke o organizaciji mjesne samouprave i nazivima ulica, trgova i dijelova naseljenih mjesta;
12. donosi odluke o udruživanju Grada u saveze i druge oblike organizovanja, te o trajnom uspostavljanju prijateljske i druge saradnje sa lokalnim i regionalnim zajednicama drugih država;
13. donosi odluke o proglašenju praznika Grada;
14. donosi odluke o priznanjima i nagradama Grada;
15. donosi odluke o raspisivanju referenduma i sazivanju zborova mjesnih zajednica;
16. bira i razrješava predsjedavajućeg i zamjenika predsjedavajućeg Gradskog vijeća;
17. osniva radna tijela Gradskog vijeća, te bira i razrješava njihove članove;
18. osniva stručnu službu Gradskog vijeća i donosi Pravilnik o unutrašnjoj organizaciji Stručne službe;
19. imenuje, bira i razrješava druge osobe određene zakonom, Statutom i odlukama, te daje saglasnost na imenovanja, izbor i razrješenja kada je to propisano;
20. osniva preduzeća i ustanove i druga pravna lica za obavljanje komunalnih, društvenih, privrednih i drugih djelatnosti od interesa za Grad, te odlučuje o njihovim statusnim promjenama u skladu sa zakonom;
21. odlučuje o prestanku ustanova, preduzeća i drugih pravnih lica u skladu sa zakonom;
22. odlučuje o prijenosu i preuzimanju osnivačkih prava u skladu sa Statutom;
23. razmatra godišnji izvještaj o provođenju gradske politike i aktivnostima Gradonačelnika;
24. pokreće i razmatra inicijativu za pokretanje postupka opoziva Gradonačelnika i donosi odluke o pokretanju postupka opoziva Gradonačelnika;
25. ocjenjuje rad ustanova i kvalitet usluga u djelatnosti zdravstva, socijalne zaštite, obrazovanja, kulture i sporta, najmanje jednom godišnje, te osigurava finansijska sredstva za unapređenje njihovog rada i kvaliteta usluga u skladu sa potrebama stanovništva i mogućnostima Grada;
26. donosi pojedinačne i druge akte iz samoupravnog djelokruga Grada u skladu sa zakonom i Statutom;
27. analizira stanje javnog reda i mira, sigurnost ljudi i imovine najmanje jednom godišnje, te predlaže mjere prema nadležnim organima;
28. utvrđuje smjernice za vođenje kadrovske politike u skladu sa zakonom;
29. donosi Poslovnik o svome radu; 30. obavlja i druge poslove utvrđene zakonom i Statutom grada.“

RAZLOZI DONOŠENJA ODLUKE

Izvršavajući zakonsku obavezu potrebe usklađivanja cijena komunalnih usluga sa stvarnim troškovima pružanja komunalnih usluga krajnjim korisnicima, Gradsko vijeće Grada Zavidovići je donijelo Odluku o usvajanju Cjenovnika komunalnih usluga i načinu plaćanja komunalnih usluga JKP „Radnik“ d.o.o. Zavidovići sa Cjenovnikom komunalnih usluga i načinu plaćanja komunalnih usluga JKP „Radnik“ d.o.o. Zavidovići čime je došlo do povećanja cijena komunalnih usluga individualne komunalne potrošnje što znači i veća mjesečna novčana izdvajanja krajnjih potrošača. Uz odgovornost primjene pozitivnih propisa iz oblasti komunalnih djelatnosti, kako bi se obezbijedilo kontinuirano pružanje komunalnih usluga građanima i osiguralo održavanje komunalnih objekata i uređaja koji su u nadležnosti komunalnih preduzeća u stanju funkcionalne sposobnosti, potrebno je osigurati i ekonomsku priuštivost komunalnih usluga svim građanima. Imajući u vidu trend rasta troškova života kojeg ne prati rast ličnih primanja, rukovodeći se načelima propisa iz oblasti socijalne zaštite i ovlastima jedinice lokalne samouprave potrebno je donijeti ovakvu Odluku o subvencioniranju troškova komunalnih usluga na području Grada Zavidovići za socijalno najosjetljivija domaćinstva.

Analizom dostupnih podataka potencijalni korisnici prava na subvenciju su već obuhvaćeni nekim vidom društvene brige po osnovu nekoliko statusa ili pripadaju nekoj od ranjivih društvenih grupa. Prema bazama podataka iz decembra 2025. godine subvencijom bi se obuhvatilo oko 4.000 domaćinstava. Službene evidencije potencijalnih korisnika subvencije sadrže 5.294 lica s tim što se po svom statusu, značajan broj njih nalazi evidentirano dva do tri puta ili isti nisu obveznici plaćanja komunalnih usluga odnosno na njihovo ime se ne izdaje račun nego su članovi domaćinstva koje nije u stanju socijalne potrebe.

Subvencioniranje se planira u iznosu koji u prosjeku namiruje potrebu većeg izdvajanja za račune komunalnih usluga u odnosu na ranije primjenjivani Cjenovnik komunalnih usluga. Donošenjem ove socijalne mjere obezbjeđuje se otklanjanje posljedica i uzroka koji mogu dovesti do pogoršanja socijalnog statusa više hiljada domaćinstava uz istovremeno ispunjenje zakonske obaveze primjene propisa iz oblasti komunalnih djelatnosti.

Zbog navedenog podnosim prijedlog ove Odluke.

POJAŠNJENJE PRAVNIH RJEŠENJA U ODLUCI

Članom 2. Odluke propisano je da Gradsko vijeće Zavidovići odobrava subvencioniranje računa za komunalne usluge građanima iz socijalno osjetljivih društvenih grupa na čije ime je ispostavljen račun za domaćinstvo bez obzira na status ostalih članova domaćinstva a ista se odnosi na račune po Cjenovniku komunalnih usluga usvojenom u februaru 2026. godine i dalje do stavljanja van snage ove Odluke. Pravni osnov za donošenje ove Odluke sadržan je u Zakonu o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/99), Zakonu o socijalnoj zaštiti, zaštiti civilnih žrtava rata i zaštiti porodica sa djecom - Prečišćeni tekst („Službene novine Zeničko-dobojskog kantona“, broj: 4/25) i Privremenoj Statutarnoj Odluci Grada Zavidovići („Službeni glasnik Općine Zavidovići“, broj: 4/2022).

U članu 3. propisano je ko su korisnici prava na subvencioniranje iz člana 2. ove Odluke, odnosno utvrđeno je pet društvenih grupa prema različitim statusima i visini ukupnih prihoda koji nisu viši od najniže penzije po propisima o penzijsko-invalidskom osiguranju. Broj pripadnika društvenih grupa po službenim evidencijama je sljedeći: - korisnici stalne novčane pomoći 145, - korisnici ratne vojne invalidnine od VII do X grupe 388, - korisnici egzistencijalne naknade 868, - korisnici najniže penzije 3857, - korisnici prava na pomoć subvencioniranja stanarine 36.

Iznos mjesečne subvencije i način isplate propisani su članom 4. Iznos subvencije je 5,00 KM sa PDV-om po jednom računu bez obzira na ukupni iznos računa. Ovom visinom iznosa se subvencionira 20 do 40% ukupne cijene računa većine nosioca obaveze plaćanja komunalnih usluga korisnicima iz člana 3. ove Odluke što uglavnom namiruje mjesečni porast troškova koji nastaju primjenom Cjenovnika komunalnih usluga navedenog u članu 2. stav (3) ove Odluke. Primjena ovako utvrđenog iznosa obezbjeđuje administrativno efikasniji sistem obračuna i isplate, omogućuje tačno budžetsko planiranje, nema diskriminacije između pripadnika pojedinih grupa korisnika sa pravom na subvencioniranje a krajnji korisnici imaju tačnu informaciju o visini subvencije bez potrebe provjere preračunavanja ostvarene visine subvencije.

Članom 5. Odluke propisan je postupak ostvarenja prava na subvenciju uz obavezu prikupljanja podataka o korisnicima na subvenciju po službenoj dužnosti od strane Grada Zavidovići i JU „Centar za socijalni rad“ koje će dostaviti u JKP „Radnik“ d.o.o Zavidovići tako da potencijalni korisnici prava na subvenciju nisu obavezni podnositi pojedinačne zahtjeve osim ukoliko se ne ukaže potreba za to ili po pozivu od strane subjekata koji prikupljaju i obrađuju podatke. Nadležne službe i JU „Centar za socijalni rad“ imaju tačnu i na mjesečnom nivou ažuriranu bazu podataka korisnika koji su nesporni nosioci prava na subvencioniranje troškova komunalnih usluga s obzirom na visinu prihoda i uslove pod kojima iste ostvaruju a to su korisnici stalne novčane pomoći, korisnici egzistencijalne naknade, korisnici ratne vojne invalidnine od VII do X grupe i korisnici prava na pomoć subvencioniranja stanarine. Podaci o korisnicima najniže penzije moraju se pribaviti putem kantonalnih / federalnih institucija iz oblasti penzijsko-invalidskog osiguranja pa je zbog mogućeg čekanja na dostavljanje podataka, u članu 5. stav (5) ove Odluke propisano da će se pravo na subvenciju primijeniti uz račun do čijeg izdavanja pristignu podaci sa obračunom subvencije od 15.02.2026. godine.

Članom 6. Odluke propisan je način prikazivanja subvencije na računima komunalnih usluga, odnosno da će na istima biti prikazan iznos subvencije za koju se umanjuje ukupan iznos mjesečnog računa komunalnih usluga, kao i način dostavljanja računa Gradu Zavidovići od strane JKP „Radnik“ d.o.o. Zavidovići radi odobravanja isplate sredstava subvencije od strane Grada Zavidovići.

Način angažovanja sredstava za subvencioniranje troškova komunalnih usluga građanima u smislu obezbjeđenja izvora sredstava za finansijsku provodivost ove Odluke propisano je članom 7. na način da će se za ovu namjenu koristiti sredstva sa već planirane stavke u Budžetu Grada Zavidovići za 2026. godinu na poziciji „Subvencije JKP „Radnik“ Zavidovići“, uz obavezu donošenja posebnog Programa kako bi se uz ispunjenje zakonske obaveze prema JKP „Radnik“ Zavidovići u svrhu subvencije investicijskog ulaganja i pomoći hitnog izmirenja zakonom utvrđenih obaveza osnivača u skladu sa finansijskim mogućnostima Grada Zavidovići, omogućilo i subvencioniranje prava po ovoj Odluci. Tokom godine moguće je vršenjem preraspodjela u budžetu obezbijediti dovoljan iznos sredstava ili u slučaju potrebe predložiti će se Izmjene i dopune bužeta za tekuću godinu. Ukupno potrebna sredstva za subvencioniranje troškova komunalnih usluga građanima procjenjuju se na cca 250.000,00 KM.

U članu 8. Odluke propisuju se nadzor nad primjenom ove Odluke od strane Službe za upravu poljoprivrede, vodoprivrede i komunalnih poslova Grada Zavidovići što znači davanje mišljenja po potrebi o primjeni odredaba ove Odluke te finansijska kontrola od strane Službe kao što su traženje izvještaja i pravdanja sredstava od strane JKP „Radnik“ d.o.o. Zavidovići.


FINANSIJSKA SREDSTVA POTREBNA ZA PROVOĐENJE ODLUKE

Za realizaciju ove Odluke u Budžetu Grada Zavidovići postoji planirana pozicija „Subvencije JKP „Radnik“ u iznosu od 180.000,00 KM koja će se većim dijelom, osim za subvencije investicijskog ulaganja JKP „Radnik“ d.o.o. Zavidovići (oko 70.000,00 KM) koristiti za provođenje ove Odluke. Planirani iznos na ovoj poziciji će trebati uvećati za cca 140.000,00 KM u drugom polugodištu tekuće godine. Navedeni iznos je utvrđen na bazi procjene broja potencijalnih korisnika prava na subvencioniranje i tačno utvrđenog mjesečnog iznosa visine subvencije po jednom računu.


Akt pripremio:


(Idriz Alihodžić)

Akt pregledao:


(Nermin Čahtarević)

GRADONAČELNICA


mr. iur. Erna Merdović Smailhodžić



BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI



Služba za upravu poljoprivrede,
vodoprivrede i komunalnih poslova

Broj: 08-45-21/26-AP-17

Datum: 30.1.2026.. godine

GRADONAČELNICA

PREDMET: Prijedlog Odluke o subvencioniranju troškova komunalnih usluga na području grada Zavidovići
-dostavlja se-

U prilogu Vam dostavljamo prijedlog Odluke o subvencioniranju troškova komunalnih usluga na području grada Zavidovići, na daljnju proceduru i dostavljanje Gradskom vijeću.

Dostavljeno:

1. Naslov,
2. U spis.



POMOĆNIK GRADONAČELNICE

Idriz Alihodžić
Idriz Alihodžić, prof.

Akt pripremio:

Amir Mahmutović
(Amir Mahmutović, dipl.ecc.)